

後山居士文集

十四



後山居士文集卷第十一



陳師道 無已

表

代謝西川提點刑獄表

惟蜀中之右地乃海內之上游家有刑  
書知而不犯地為沃野富以無求圉  
屢空枹鼓幾息久安周召之化寢成齊  
魯之風延見吏民間所疾苦諭以寬大  
之意使無鞭朴之憂觀其歡欣見于眉

睫無以為報莫知所言 中謝 伏念臣賦

命數竒與人寡合以記誦之學起畎畝  
之中以刀筆之能供州縣之役居無邑  
里之譽孰為後先之容况茲罪戾之餘  
宜在棄捐之數因緣過聽蒙被誤恩備  
負理官久出眾人之後奉使詔獄再為  
萬里之行明大義以決疑無儒者之効  
奉三尺以從事有俗吏之譏自知甚明  
人望何在豈期幸會復與選中用過其

能恩非所望此蓋伏遇 皇帝陛下以  
神明之德當制作之時樂與諸臣慎守  
成法明揚不次之位期致非常之人顧  
臣之愚何以爲報謹當竭犬馬之力收  
桑榆之功明慎庶刑尉安遠俗以身許  
國不知蜀道之難視日近人信有長安  
之遠

代賀興龍節表

四序運而歲成爲地之統萬物備而聖

陳一一

二

作得天之時敢忘事上之恭竊有增高  
之意恭惟 皇帝陛下當天受命繼聖  
承家性成堯舜之仁躬行曾閔之孝鑒  
觀前載考古義以御今退託未明順下  
風而問道方大冬之協律仍千載之膺  
期日月清明光氣充塞庶邦有衆願効  
忠臣之心萬年無疆請祝聖人之壽臣  
莅官有守稱慶不遑永懷盛德之行更  
覺長安之遠

代謝賜晉日表

敬授民時永惟三事之本欽崇天道以  
協陰陽之和凡爾有邦共承大賜恭惟  
太皇太后陛下以神明之德成天地之  
能盡萬物同其仁與四時合其信迎日  
推筴極天地之至精敘事授方修治朝  
之故事臣敢不以時宣政因歲考功庶  
寬水旱之憂少逭簡書之責

又

陳十一

三

君以民爲心既同其樂人以食爲命必  
謹其時爰舉舊章以興嗣歲中謝恭惟  
皇帝陛下聰明好學制作順民生資堯  
舜之仁躬行曾閔之孝與天同德固無  
先後之違繼古成能宜有始終之合臣  
謹當布昭寬大勸省事功使無凍餒之  
憂庶有消埃之助

代謝夔路提點刑獄表

三巴之險雖天下之畏塗一道之權乃

士倫之高選衆之所慕私以爲憂

中謝

竊以遠之則怨人之常情寵至而憂士  
之深慮粗識事君之義豈敢辭難孰聞  
長者之言不能無懼然臣忠有餘而智  
短心益壯而力殫顧貪寵榮何以稱報  
重念古術學無以應敵容貌不足動人  
早以一經誤當公選晚緣再黜幾失明  
時雖已往之莫追冀方來之可補此蓋  
伏遇 太皇太后陛下用地之道乘天

陳十一

四

而行刑賞交修功過並用稍寬罪戾復  
在憫憐取其一日之長付以百城之寄  
謹當益堅故意以濟暮年志輕萬里之  
行身驅九折之險宣昭聖人之化期於  
無刑竭輸老馬之能託于不朽

### 代謝賜恤刑詔表

皇心隱惻念及庶方天語丁寧形於一  
札伏讀感歎至于再三

中謝

伏以克謹

常刑聞之在昔著爲故事方自今朝每

於炎燠之時屢下寬大之詔輝光四燭  
囹圄一空人自不寃刑由是措伏惟

皇帝陛下以不忍之心而行不忍之政  
當非常之事而有非常之功燕處清閒  
不忘三木之被體功施動植尚懼一夫  
之向隅誠意所加孰不感動德澤之下  
無復過差雖奉累聖之成規實自一時  
之至意臣職親訟獄恭奉德音實與吏  
民同深慶抃

陳一

五

### 代賀冊皇后表

爰歷靈辰肇修內職禮成一代風動四  
方

中謝

臣聞朝廷之治本乎家婚姻之

道正乎始爰求茂族用配哲人龜筮協  
從人神同福恭惟 太皇太后陛下憂  
深廟社謀及子孫既成天德之剛復修  
陰禮之助本支百世浸被周南之風壽  
考萬年膺受天下之養臣職當守土世  
受懋恩欣聞大禮之行莫預外庭之賀

代賀正表

行夏之時正得三元之會祝堯之壽願  
同萬國之心中賀伏惟 皇帝陛下勇  
智自天光文協帝仁而博施盡日月之  
照臨聖而不居究古今之治亂徒見成  
功之速莫知歲用之微臣祇領郡章親  
逢盛旦建四三王之禮更深太史之嗟  
舉千萬歲之觴徒切封人之意

代賀西安州表

陳十一

六

奉清廟之遺策還職方之故區因賞竝  
行人神同慶中謝竊以繼志述事孝之

大原取亂侮亡古之常道既重譯之來  
享而小醜之弗賓金鼓一鳴河山四裂  
斷匈奴之臂告成太平之功藏郅文之  
頭永爲夷狄之戒伏惟 皇帝陛下勤  
於堯禹英類 祖宗仁政而有勇功文  
德以立武事表西郊之道示無萬里之  
行舉外廷之觴更上億年之壽



代賀生皇子表

甲館告寧夫為百瑞恩言周布歡動四方  
中賀臣聞聖則多男人之所祝冠而  
生子古以為祥恭惟昌期宜有昭報上  
以慰兩宮之念下以為萬世之基凡在  
寰區舉興善頌伏惟 皇帝陛下聖神  
文武眷哲溫恭以天縱生知之資務日  
就默識之學內修法度煥然一代之文  
外服戎夷終自兩階之舞承列聖之不  
緒方懷燕翼之思以百姓而為心宜有  
子孫之福益著思齊之聖更形既醉之  
詩十四月而生堯已有同德之兆千萬  
歲而壽武願同庶物之心

又

吉月令辰是生元嗣榮光休氣昭示聖  
期天地合符華夷交慶  
中賀臣聞王者  
之孝以繼體為先人子之心以順親為  
樂惟時盛旦顯有休符幼徇成明將主

七廟之器抱孫弄稚祇奉兩宮之歡伏  
惟 皇帝陛下以人爲心視民猶子三  
刑設而未用五兵儲而不陳鳥獸蟲魚  
咸得其所山川神鬼亦莫不寧故得萬  
物之歡心而獲百順之顯福國勢定而  
加重人心安而益舒四海同聲豈特封  
人之祝三靈効祉不待高禩之求建昭  
代之盛儀弗從故事第從臣之嘉頌莫  
効微材

陳士

八

代賀冊皇后表

龜筮協從古今同貫盛儀旣舉休氣來

臨臣

中賀

竊以三后興邦必有同心之

助六朝成憲著聞積德之外惟關睢左

右之求有思齊十百之報人有所仰邦

其永昌恭惟

皇帝陛下旣聖不居持

成如始攷圖數貢盡雨露之所濡緯地

經天宜陰陽之備位爰因誕聖遂正洪

名德配二宗竝有照臨之意功施四海

居無怨曠之聲豈意暮年數逢盛事

又

功德兼茂禮命載崇慶自宮闈逮于寰  
海臣某中賀竊惟母以子貴既三代之  
舊章位以次升乃六朝之盛德惟紫庭  
之虛位更寶曆之累年雖聖念退抑以  
未遑而天下屬望之有在嗣既自出天  
猶不違爰歷靈辰茂膺大典恭惟 皇  
帝陛下寅畏天地攷法祖宗以義勝私  
出入詩書之府由今望古度越周召之  
風爰興舉於上儀用光華於盛旦室家  
胥慶日月增明萬物順成氣得陰陽之  
備三靈錫羨壽有岡陵之崇

論國子賣書狀

右臣伏見國子監所賣書向用越紙而  
價小今用襄紙而價高紙既不迨而價  
增於舊甚非聖朝章明古訓以教後學  
之意臣愚欲乞計工紙之費以爲之價

務廣其傳不以求利亦聖教之一助也  
候 勅旨

貼黃

臣惟諸州學所買監書係用官錢買  
充官物價之高下何所損益而外學  
常苦無錢而書價貴以是在所不能  
有國子之書而學者聞見亦寡今乞  
止計工紙別爲之價所與學者益廣  
見聞以稱朝廷教養之意

陳二

十

代乞郡劄子

臣近累具辭免新命陳乞外任伏蒙聖  
恩未賜俞允愚誠不切天聽未回義之  
所安言不能已臣聞君使臣以禮臣事  
君以義施報之道也故上有好禮之君  
則下有行義之臣各盡其道以致其和  
陛下於臣可謂盡禮矣臣事陛下敢有  
不盡傳曰有言責者不得其言則去又  
曰陳力就列不能者止夫古人之仕者

三諫則去豈懷怨嫉自絕于君蓋先主  
之制其退以義以防臣之苟容而忠臣  
之心以去爲諫尚幸君之感悟今臣可  
謂不得其言矣而况衰病浸加筋骸莫  
彊睛瞳昏眊白黑僅分又可謂不能矣  
負二耳去尚欲何求臣若冒罪彊頌奉  
詔居位則累黷聖聽徒爲空文豈特言  
行相違抑亦欺君賣友惟其守死不覺  
煩言恭惟陛下惜臣之去不若用臣之  
言臨臣之恩不若行臣之義察其迫切  
忍不聽從雖渙汗之命莫回而匹夫之  
志不奪伏望 聖慈早賜除臣一外任  
差遣

後山居士文集卷第十一

後山居士文集卷第十二

陳 師道 無已

啓

代謝西川提點刑獄啓

祇奉誤恩過承重寄榮生意外愧見顏  
間方國家有爲之時乃賢智自効之日  
凡在選掄之數與有太平之功惟茲庸  
蜀之郊限以河山之阻遠人異俗未知  
勸禁之方下吏淺聞莫諭天人之際宜

陳十二

一

得一時之士以爲百吏之師如某少則  
賤貧古之愚直記誦之學豈有異聞刀  
筆之材未堪大用奉使五嶺才有去來  
之勞備貢中都徒歷歲時之久勤不補  
拙名過其情方虞譴訶敢意僥倖此蓋  
伏遇某官人非求備物使得宜勞其萬  
里之行付以百城之寄駑駘已老未忘  
阜歷之恩鷄鶩何知不識鼓鍾之樂

謝徐州教授啓

四月二十八日蒙恩授亳州司戶參軍  
充徐州教授者誤膺公舉所譽過情伏  
讀訓詞以榮爲懼惟士之干世如女之從  
人必待禮而後行將正身以及國唐虞  
在上無自獻之八元魯衛之間有歷聘  
之一老雖用舍之有在乃天命之適然  
苟非其人則爲亂俗若師道少則不敏  
老而無聞竊懷匹夫不奪之心庶幾君  
子難進之節是古之學勤而無功自好

之文華而不實然賤而多藝乃孔子之  
不爲雖窮則益堅待文王而後作旣所  
長之無取敢有意於多求豈期天幸之  
來辱在薦賢之數起於徒步名以師儒  
慄股汗顏不勝愧畏爝火不息幸依日  
月之光馬羣旣空遂及駑駘之輩再念  
某羈孤百出度越半生方寄食於游從  
期轉死於溝壑母子不保更懷喜懼之  
私夫婦相望限以河山之阻惟茲五斗

之祿足爲十口之生追還妻孥收合魂魄扶老携幼稍比於人飽食煖衣少緩其死捧檄以喜知毛義之有親倒道而行顧主偃之已老此蓋某官仁而徧愛明以有容爲國求才與人同樂顧羣能之畢用憫一夫之向隅方施咳唾之餘已戴立山之重德無以報徒懷犬馬之心命苟乘時願效鉞刀之用

荅諸先輩啓

陳士一

三

伏審興賢東里待問明廷深惟災異之原論著古今之効惟義所在可舉而行歷皇覽以興嗟褒嘉言而賜第魁梧竒偉究見忠臣之心深切著明更觀儒者之効惟此得人之盛莫居吾黨之先作者七人遂空冀北之野傳之千載復聞泗上之風辱在游居與有光寵旣竊知人之目又當盛禮之臨感服無忘敷陳未旣



代荅南京留守王待制啓

試守東州初無善狀奉使西道信有誤  
恩被聖訓之丁寧奉明詔之寬大惟此  
八州之衆荐更連歲之凶視凋瘵以興  
嗟頽闊迆而無術莫寬憂顧徒積兢慚  
某官學以名家行爲世法隱然天下之  
望蔚爲君子之儒比事屬詞名出漢廷  
之右愛民憂國政居良吏之前方此有  
行未遑致問不圖貶損遽辱褒嘉喜懼  
不勝筆舌難盡

陳士一

四

代謝再授徐州教授啓

中臺絕望邈如天漢之光孤官易危慄  
若秋霜之實方去留之未定顧聲問之  
不遑逮此踰時復伸故意昨緣知舊出  
守東南念一代之數人而百年之幾見  
間以重江之阻莫期再歲之逢使一有  
於先顛爲兩塗之後悔又謂中山之相  
仁於放麀亂世之雄疑於食子惟其信

之既篤所以行之不疑豈意喧傳遂煩  
公議方衆言之成市雖百虎而可疑賴  
日月之竝明而仁人之在上深知曲折  
公賙保全憐其母子之窮還以斗升之  
祿原恩有自攬涕無從願爲執鞭喜有  
逢於晏子期之異日報不後於竒章

代荅馬狀元啓

祗承明問顯効至忠拳拳有愛君之心  
亶亶明當世之務遂更帝覽明被官恩  
擅一代之風聲聳四方之觀聽諫而見  
信寧懷小祿之私言之非難更試大儒  
之効豈期厚貺先辱吉音向德之深非  
書可旣

代賀門下蘇侍郎啓

顯膺明制登進東臺賢能所居位望加  
重成命四達衆言一同竊以帝者不難  
於信任而難於知人君子不患乎富貴  
而患乎所立上以爲賢而下不異名之

所善而實與同故能邪正不亂而用究  
其能終始如一而人不失望不有君臣  
之合孰明治亂之分共惟某官行法於  
身成言於德名在三君之列行爲百世  
之師方其在布衣之中已有經天下之  
志對嘉祐之問則刺切明主議熙寧之  
法則違迂權臣人之所難行而甚易事  
之未効識其當然故身雖窮於江湖而  
望已在於廊廟遂膺大用顯有不功人  
之言三揖而升遂正商衡之任某繫官  
汝穎阻拜門庭實與斯民不勝至願

賀兵部蘇尚書啓

入侍邇英出司武部成命一下歡聲四  
來竊惟八座之崇以待二府之選章帝  
之眷郅壽豈惟詞藝之工文宗之用贊  
皇亦爲登進之漸昔有故事號爲美談  
尚書侍讀以俎豆之聞爲軍旅之事以

道德之老備師傅之官偃革修文尚須  
伯益之贊拜章歸道益隆桓氏之風遂  
正洪鈞以綏四海周登魯衛深惟政事  
之同唐用孝溫或爲前後之繼公望如  
此私心與同致慶以還執筆而俟

賀許州梁資政啓

伏審抗章被寵引疾就閒人之所嗟深  
爲兩宮之至計自以爲幸復託四壁之  
餘光恭惟某官以公恕之心言者無怨

以循良之政去則有思雖夷險之百爲  
而始終之一節迨茲登進方後升平而  
不盡平生之懷遽起山林之興辭名遁  
祿雖自計之甚都挈國濟民如人望之  
未已即膺闔舊復此奮庸雅志不違盡  
復東山之舊陰德未報終享博陽之封  
某向以不虞之名誤被非常之舉間緣  
臯戾自取棄捐雖百毀之交興而一顧  
之不改永惟厚施何日可忘念方佐理

之秋莫効暄寒之問畏人言之爲累豈  
日遠而遂踈夢得自憐不識平津之閣  
仲郢圖報敢異竒章之門區區之愚筆  
舌莫旣

賀本郡劉大夫啓

光奉宸恩鎮臨近服風聲所被人士同  
歸共惟某官德盛而行高學優而文富  
名成於實旣久而彌芳政出於仁所居  
而稱治荐更中外顯有動猷倦青瑣之

陳士一

追趨思黃堂之偃息穎雖文學之國近  
罹水旱之憂倉廩旣傾飢寒并解鯨鯢  
就戮金鼓不鳴方茲安養之秋樂得循  
良之吏斯民相慶舉興五袴之心下吏  
自憐獨有二天之覆

代上郭漕啓

昨聞行節已次外臺顧無半面之交空  
懷鄙意復託二天之賜敢後衆人敬修  
咫尺之書用伸燕雀之賀空函而往方

切東陽之思一紙爰臨更覺荊州之重  
雖小人之懷惠惟君子之好謙感服之  
深夙宵未已伏惟某官名成一代德冠  
四科贊治南宮國有九年之蓄出節西  
道政回千里之春即慶褒嘉遂膺圖任  
炎蒸方熾興息惟時向往之誠筆墨莫  
盡

代與宰相賀正啓

歲月日之三元惟此夏時之正德壽康

陳一

九

之五福莫如君子之宜凡在陶鎔舉興  
禱頌伏惟某官御今以古同德于天行  
既久而益完言當事而成實進退可度  
蔚然百世之師望實竝隆卓爾十人之  
右爲蒼生而再起與三代以同功迨此  
元辰茂膺百祿重戴憑之席爲儒者之  
至榮登王道於牀極人臣之殊禮傾依  
祝詠交集惊靈

代與執政賀正啓

獻歲發春驗天時之興廢履端居正觀  
君子之威儀伏惟某官抗志不羣誠身  
以善雄深雅健文爲一代之宗敬義直  
方名列四科之上出溝亨嘉之會踐更  
中外之難致主惠民已著大儒之効因  
時受祉益隆仁者之年傾祝之深翰墨  
莫盡

代罷郡謝執政啓

獲解郡章言還里閤荷庇休之有素懷

陳士一

十一

感愧以交深伏念某一被選掄屢更任  
使初無閔閔以謝生成昨者罷使朔方  
分符近輔遽蒙易地皆出異恩惟此東  
州素稱劇郡盜居天下之冢吏用柱後  
之文承平百年風俗一變枹鼓不作圉  
圉屢空顧無施設之勞不覺歲時之逝  
及瓜而代曾不滯留奉身以還又逃罪  
戾伏遇某官潤色皇度肅清海隅元無  
一物之私均被二天之賜致茲迓拙終

獲保全顧雖顛愚亦知感激受一錢之  
賚無循良之可稱奉三歲之期顧筋骸  
之難彊

賀亳州林樞密啓

辭榮就逸按節躬邦公議所同深惜袞  
衣之去輿情有慶又聞竹馬之迎顧此  
東藩實惟舊治吏民安於條教草木識  
其風聲豈期歲月之間復見羽旄之美  
歡聲一動和氣四來不勞施爲復此安

陳三

上

靜伏惟某官智周世變道與天同蔚然  
儒者之宗卓爾名臣之右始終一節出  
入三朝雖屢屈而不移故旣壓而復起  
迨茲登進方後奮庸而功成不居名下  
難久旣與時而進退寧有意於去來雖  
雅志之不違如蒼生之失望天從人欲  
政在老成恐坐席之未溫而鋒車之迅  
召顧惟庸望早辱知憐家禍私憂不勝  
多難避窮就食固已屢遷方虞溝壑之



憂莫効寢興之問永惟眷顧肯賜棄捐  
五月披裘未負平生之待千里命駕敢  
忘向慕之心

後山居士文集卷第十二



